

皇清文穎續編

皇清文頴續編卷二十三

頌

平定回部頌

謹序

戈 濤

皇帝神聖威武撻伐西域五年之中大勲再集闢地  
二萬餘里依古聲教不通之地桀驁不可馴擾  
之民無不稽顙內面奉職貢請官吏以耕以樹  
作我氓赤創千古未有之功釋舉世之疑開萬  
衆之惑羣臣心帖首俯欽仰

聖烈而

皇帝撝謙退讓歆然歸功於

天夫

天之所啟

聖人所承也

天命未彰惟

聖克明也

天心屢試以危疑

聖人堅定不搖而卒有成也大人之機微乎微乎

臣

謹追述始事敷陳繼舉而卒以頌成功焉夫準  
噶爾額魯特以亡元叛僕盤據西海芽含卵育  
至噶爾丹頑梗弗率

聖祖仁皇帝戎車三駕殄此醜虜策旺阿拉布坦保  
其餘衆跼伏伊犁生聚稍滋敢肆厥侮嚙哈密  
躡西藏

聖祖武緒未竟我

世宗憲皇帝是以有申討之舉策旺隕命厥子噶爾  
丹策楞濟惡稔凶掠我巴里坤襲我和卜多已  
而貪利敗捷是用乞和

世宗念地遠費繁不可究武允請班師是非我

國家兵不彊謀不盡抑亦虜未有間天時不可不  
遵也我

皇上撫臨區夏遠至邇安值準噶爾篡奪相仍內訌  
外叛三釁既開弗攻弗乘蓋我

皇上審端慮始如此乎其兢兢致慎也既而諸台吉策楞阿睦爾撒納班珠爾率衆十數萬先後來歸卻之阻向化之心處之溢邊陲之地因勢乘便取亂侮亡在此舉也

皇帝毅然不惑內斷於心興兩路之師誅數世之寇風馳雷奮雲蒸雨灑糗糒載道壺箪迎路自二月興師五月窅入其境遂有伊犁達瓦齊結營格登擁衆踰萬我偵候二十五人夜斫其營登

壘一呼萬衆駭散達瓦齊慶奔狼顧遽爲回部  
所縛獻於我師蓋我師之始平伊犁初無張弓  
遺鏃之費不半載而大功克奏如是乎其易且  
速也

皇帝恢無外之模建不拔之策因其地實其人衆建  
分藩剖立四衛拉台吉將以寧邊息衆永固我  
圉而阿睦爾撒納包藏禍心窺伺全部逞狙詐  
之謀奮狂狡之力焚我臺站傷我游徼而巴彥

克什木諸逆乘機煽亂泯泯夢夢以廓清摧陷  
之餘爲跋扈馮陵之勢此固非人情所及料而  
亦我

皇上先幾豫燭馳授密計而畏事者喪機黨惡者速  
斃也

皇帝赫然震怒益兵迴旅撫順勦逆阿逆竄青滾戮  
諸台吉畏罪悔禍請討逆以自贖於時雖有怙  
亂之酋受欺之將而哈薩克全部內附助順捕



三十三  
叛反覆者人醜其德背逆者天奪其魄去哈薩克而無歸入俄羅斯而自斃冥誅旣伏

天討已伸方斯時也伊犁再定準噶爾悉入版圖而東西布魯特左右哈薩克跂足接踵傾心歸化議者竊謂功已成事已藏矣而

皇帝曰未也夫大小兩和卓木本爲準噶爾所拘我師初定伊犁釋其囚還其地以兵送波羅泥都歸葉爾奇木而令霍集占鎮撫伊犁回衆

國家之於二酋也所謂生死而肉白骨也而乃狼  
子野心背恩孤德當阿逆背叛霍集占狡焉思  
逞助攻勤王之師及其跳歸舊穴乃敢戕我王  
臣拒我師旅此而弗誅是

國法屈於小醜巨惡逃於大刑而死事之誠臣無  
以殲其仇而雪其憤也於是圍庫車取霍逆霍  
逆以鳥投羅復如兔脫網否臧失律用易元戎  
將軍兆惠以收輯餘黨之師爲旋定回部之舉

庫車克阿蘇收烏什和闐以次畧定兵逼葉爾  
奇木夫葉爾奇木二酋之巢穴也引久行之師  
攻坐據之寇驅三千之衆敵數萬之虜多寡之  
勢旣懸勞逸之形又絕猶且破銳衝堅退保黑  
水固壘三月屢挫賊兵設也外無飛符馳檄之  
援內有屠馬煮革之患縱未及敗亦所謂危而  
乃掘地得泉探窰得米旣已邀

天之助而

聖慮遐周神機默啟早於先事勅集戎行本爲更易  
之分番乃作赴援之精銳副將軍富德麾鉞於  
前參贊阿里衮驅馬於後奪其險據解彼重圍

兩酋知

天誅之必加諗故巢之難守跳而遠遁遺部就降我  
師周撫新疆遙追逋寇霍斯庫魯一蹶其足柯  
爾楚爾再折其翼伊西洱庫終搃其吭三祛之  
餘萬衆潰盡負其殘喘投入拔達山中其汗素

爾坦沙畏我

天威奉檄請効二酋授首露布以聞

皇帝稱慶

慈寧

御殿受

賀

郊

廟告祭諸典靡不具舉

親製大學碑文以爲事本

天功無異人力

臣

伏讀之下竊惟千古大功之成雖

出冥冥之啟迪而實由於一人夙夜敬畏天命

之一心

臣

伏睹西事始乙亥春訖己卯冬五年

之間事機變遷亦云屢矣

皇上不爲議尊不爲難止不爲小挫而中罷不爲小

得而姑安人咸謂

聖人之功惟斷適成矣

臣

以爲未識其由然也夫斷

生於明弗明者其果或窒而明生於敬弗敬者  
其熙胡緝我

皇上審謀發慮應機察變事未至而省括事既至而  
響應羣臣雖不及窺而於已事則既知之矣至  
於乾乾惕惕祇祇翼翼之

聖心實有不能遽窺於宵旰中者而臣於不自滿假  
不居成功之一日竊有以仰溯而微窺之此我

皇上光紹丕基誕迓我

國家億萬世無疆之休者也謹拜手稽首而獻頌

曰

惟天斯覆惟地斯載窮陬絕域豈有內外古曰羈縻  
力所弗臻撫而有之乃亦吾人伊犁阻荒

先朝姑置匪曰不能時則未至我

皇乘時桓桓于征摧枯拉朽三月底平旣底旣平將  
衆建侯阿逆跳梁煽亂諸酋順我者撫背我者鋤羣  
凶獮薙首逆冥誅準夷所拘兩和卓木我釋其囚我



還其族背恩反噬戕我王臣此而弗圖

國法焉存庫車和闐覆巢擣窟衆回離畔踉蹌奔突  
素爾坦沙拔達山汗馘其二首露布遙傳西域蕩平  
擴二萬里我賦我租我疆我理始乙亥春訖己卯冬  
五年之間大功再崇可與觀成難與慮始借曰道謀  
此功曠矣惟

聖克明惟

聖克斷

聖讓弗居曰惟

天眷

天眷我

皇

皇敬承之業業兢兢如弗勝之

臣拜稽首

聖敬日躋億萬斯年勿替在茲

平定回部頌

謹序

朱筠

皇帝克成

祖

宗之志億萬萬年敬

天休命曰惟我

國家

太祖

太宗肇造東土誕膺

帝眷

世祖受之自天之下薄海中外我隸我臣

皇祖

皇考仁浹義廟旣臻大釐張皇六師討於西醜今畀  
付在予予一人其不敢忘卽昨以來思繼思述  
惟十八年都爾伯特台吉策楞烏巴什等率所  
部萬人斂關內附準噶爾部部分四衛拉特曰  
綽羅斯曰輝特曰和碩特曰都爾伯特此其一

台吉也明年阿睦爾撒納自輝特來降且乞師  
請誅準噶爾部之亂

皇帝以示在庭或曰額魯特準噶爾負固之日久矣  
自我

世祖賜其酋顧實汗冊印俾統西陲諸部厥後噶爾  
丹自立爲台吉犯我喀爾喀境

聖祖三征迺俘厥子逮策妄阿喇布坦及噶爾丹策  
凌再世濟惡數擾哈密

世宗命將殲之于額爾得尼招自是以來邊圉寧謐  
迄於今今茲以厥部亂故卽我其人獸心恐不  
可信

皇帝曰嘻是

皇天將以西陲之壤授予而佑我於

列聖之志也往者噶爾丹策凌死其孽子喇嘛達爾  
扎者實奪其嫡策妄多爾濟那木扎爾之位居  
無何達瓦齊復竊而有之四部離心若走水火

抱持鞠子用大哀籲於我王師欽哉欽哉時不可失是秋

皇上幸熱河召見來者與語推布驅策盡得其要領爰

命班第爲將軍卽以阿睦爾撒納副之使導我師且令固倫額駙色布騰巴爾珠爾與之偕察其動止以集軍事二十年春

詔西北分道出師兩軍會於阿爾泰山踰山而下譯

者奉檄宣布所過諸部台吉在前宰桑在後犒  
師相次我師入於伊犁達瓦齊以其屬人奔伊  
犁河而西我師渡河躡之於格登山卽俘以來  
皇帝御午門受之赦達瓦齊封爲親王伊犁平初阿  
睦爾撒納覬覦爲大台吉欲盡有四部及聞王  
達瓦齊不誅而所欲未之厭居常怏怏不衣賜  
服軍中所在檄書輒用私印徵發狀頗聞

皇帝密詔將軍班第等令誅之未發阿睦爾撒納覺



之跳去且流言以撼其黨巴磔克什木等發兵  
斷我臺路將軍班第參贊鄂容安等死之或曰  
賊勢方張不易撲滅也

皇帝曰吁是其可赦二十一年師進討賊阿睦爾撒  
納亡命入哈薩克明年春復

命將軍成衮扎卜等自朱爾都斯入伊犁將軍兆惠  
等自額林哈必爾罕入塔本集賽撫定諸部阿  
睦爾撒納復自哈薩克潛還伊犁遭我軍逸去

我軍躡之遂壓哈薩克境其長阿布資震恐誓  
以擒賊自効阿睦爾撒納知之遂走死俄羅斯  
界

皇帝遣使以舊約問俄羅斯俄羅斯曰如約遂函其  
骨使者驗實以聞於時伊犁再定諸部台吉惟  
都爾伯特以恭順存而其他綽羅斯台吉噶爾  
藏多爾濟爲達瓦殺之來降輝特台吉巴雅爾  
以叛誅和碩特台吉沙克都爾滿津貳於我殲

之巴里坤外四衛拉特悉收悉平其叛者惟回  
部大和卓木波羅泥都小和卓木霍集占兄弟  
小和卓木霍集占者故爲準噶爾拘於阿巴噶  
斯以役其部人者也我師入伊犁初霍集占囚  
服乞命乃縱之歸俾統其舊部已而副都統阿  
敏道以百人入盟賊盡戕我人以叛

皇帝赫然震怒命將軍雅爾哈善圍庫車討之賊擁  
大城四庫車其一也急來援冒死入城而令諸

城置伯克以守久之不支賊潛委空城遯其旁  
城曰阿克蘇亦逐其伯克降

皇帝以雅爾哈善縱賊失律誅之而令兆惠代將當  
是時兆惠方逐賊伊犁間聞

命旋師道出布魯古特部其長圖爾古特內屬參贊  
富德亦將兵絕幕會塔什罕與右部哈薩克構  
兵我軍入其兩陣間諭以

威德右部長阿比里斯上表稱臣且曰願得自効倍

左部由是左右哈薩克東西布魯特並遣使至  
京師遂畧烏什收和闐以二十三年冬師抵葉爾  
奇木城下是役也我軍三千周行萬餘里比渡  
河僅四百人所向殺賊無算然軍亦稍罷遂保  
於黑水堡賊兵萬餘人圍之數匝我軍糧乏火  
器且盡輒獲神應與賊相持數十日而副將軍  
富德率援兵疾行郭畢中馬力復不進或曰孤  
軍深入失援事且急矣

皇帝曰咨予夙夜念軍士勞苦令所在各選士馬以代久役者

皇天相予其或以是濟師先是六月既有成命及冬諸軍先後並在途副將軍富德檄諸軍進援人爭先恐後二十四年春參贊阿里衮率後隊馬悉至軍用夜半斫賊營呼聲動天與將軍軍相聞中外夾擊賊顧我軍不見首尾大駭入相躡蹂圍旣解我軍合而入阿克蘇賊退而入葉

爾奇木及喀什噶爾二酋分二城守之我軍士  
馬亦暫休息夏

皇帝命將軍兆惠軍自烏什取喀什噶爾副將軍富  
德軍自和闐取葉爾奇木毋令賊自相救閏六  
月師至伊克斯哈拉參贊明瑞夜畧地獲回部  
六人云霍集占兄弟聞大軍分道且至懼甚先  
棄城去我師遂收二城降其伯克等兩軍再進  
參贊明瑞追擊賊於霍斯庫魯克副將軍富德

追擊賊於阿爾楚爾其衆悉降二酋僅率其醜  
三百人走拔達克山我軍臨其所部責問罪人  
其長素爾坦沙順命卽斬二酋獻之西陲者定  
羣臣請上

尊號不許令所司察典禮告祭

天

地

宗



社

山陵釋奠

孔子嶽鎮海瀆百神之祀罔不歆秩行慶冊勲先是

皇帝念將軍黑水之勞旣封兆惠爲公至是加賚宗室公品級鞍轡以昭異數封副將軍富德爲候富德及參贊公明瑞阿里衮並予雙眼翎中外在事大臣等叙功行賞有差

詔頒天下

御製太學碑文勒石告成垂示無極臣職在編纂竊

不自揣僅卽所聞見知識據事直書作頌一篇

其辭曰

天祚我

清有天下來卽而順莫不受嘏嘏矣西部曰厄魯  
特自

列聖世不賓於德顧實汗裔有噶爾丹跳梁爲亂三

討以安阿喇布坦策凌阿占世世革竊濟其慝讒始  
康熙年逮於雍正

皇祖

皇考有志未竟我

皇受之曰予可忘欽承

天命順之者昌承平日久兵革不用仡仡九邊戒毋  
易動羣鼠之穴相齧爲盜卽我邊吏呼

天來告

皇帝曰嗟哀汝遠人汝有孽子實戕汝君汝臣竊之  
曰達瓦齊汝部創甚予其出師迺

詔將軍導以來者孰禦我士孰止我馬奔走諸部台  
吉宰桑我筐維實我壺維漿所過道里奉檄宣布踰  
阿爾泰行其庭戶兩軍旣合直抵伊犁縛達瓦齊於  
河之西成功之速古所未聞撤納叛走四部再夢我  
師殛之自哈薩克入俄羅斯遂獻其骨有和卓木兒  
弟殘賊忘我解懸戕我使節克其列城不自悔罪於

黑水上抗我執事

皇帝有命諸軍速行圍解師合再礪甲兵黃間一發  
兩禽遂連我武之揚拔達克山繫達瓦齊以殪撒納  
二酋授首及此三捷惟

皇帝功斷之自已出師五年闢二萬里惟二萬里我  
服我餐實有大造于西之人賜西人布自阿克蘇賜  
西人田至於庫車自其左右有哈薩克自其東西有  
布魯特曰歸我

皇初隔中外今其屬國同被冠帶曰慕我

皇始頑而昏今之西極咸尊咸親凡此武功非拓土地曰嗣

列聖以承

先志昔之西陲

聖祖三征

皇帝定之悉爲編氓昔之西陲

世宗遠伐

皇帝定之比於門闥惟我

皇帝永念勿忘

皇天佑之有此殊方出師之初衆惑不信

皇帝內斷師遂以進及於秦功屢陂而平

皇帝不疑遂以有成其進其成

帝歸之

天屏絕羣議

帝志之堅惟我

國家自東肇興率彼西土餞日惟寅惟四極所

天付

皇帝

皇敬受之治億萬世



皇上五旬萬壽頌謹序

金 牲

欽惟

皇上榮鏡八表在宥六合自我天覆萬物熙熙莫不  
敷錫純嘏登於仁壽大哉五龍有熊以來未有如今  
之盛者也歲上章執徐

皇上御極二十有五年篤

天之祐五十年如一日秋八月恭遇

萬壽聖節前期王公卿尹以下中外遐邇至於日域

月蝟之長咸在莫不蹈舞歡呀以迓

鴻休介福固請

上不許且禁藩臣毋有貢獻以恭儉爲天下先此帝  
堯安安之德舜禹翼翼之心至矣曷以加焉

臣

蒙

恩趨直

內廷備官

講幄伏見

皇上至仁浹於垓垓大功配乎圓矩而不有不居與

天緯無極

臣

竊研求詩書依事附麗以致紀述頌禱

之義蓋畫績之工無以與於穆清之光洞酌之

勞無所加於星宿之導矣

臣

惟洪範次二曰敬

用五事次五曰建用皇極次九曰嚮用五福言

王者有恭從明聰睿之德與天合極則斂時五

福而壽康天錫諸福之徵可致也

臣

伏思

皇上每歲見於

天

地者四凡有大功大典必

躬親告焉所謂面稽天若者也

皇上以

天

地之心爲心故夙夜基命宥密自

宮庭之上及乎環海之遠一張一弛與

天符契是以自

天佑之丕應俟志然則建極斂福自然之理惟

天助順惟

聖信

天豈獨欽柴宗祈樵蒸昆上然後錫羨哉天保之詩  
曰吉蠲爲饗是用孝享言王者能通追來孝故  
祖考歆格而萬壽無疆也

皇上以

列祖之心爲心時享歲祫則秬鬯胙饗乎

太室報本溯遠則

龍駕護畧乎

兩京況乎

耿光

大烈克纘克繼昔周武之時西旅貢巢伯朝肅慎賀  
故其詩曰受天之祜四方來賀於萬斯年不遐  
有佐方之今日崑崙雷轟罔不率俾

天子之孝孰有加於是者乎然則弗祿攸降豈必禴

祠丞嘗玉璫黃流哉

皇上奉

皇太后怡懌色養問

安則斯夕乎

春暉之堂

時巡則左右乎

金根之輦讓善介祉則

金冊玉寶

微懿尊顯蕃釐用集明年冬恭遇

皇太后七十萬壽嘉會駢翕天人慶豫易曰受茲介  
福于其王母頌曰綏我眉壽亦右文母斯則元  
會之隆昌熾之美億萬斯年永遵於一時者也  
皇上作民父母所其無逸日暘日雨誠感沖漠蠲除  
振貸之

詔歲以百千巨萬計

躬臨隄防度工鳩民江淮河濟萬世永奠風陰暑寒



四極和會懷生之類晞光濡沫者罔不鏡照而樽飫之詩曰民之質矣日用飲食羣黎百姓徧爲爾德言民和而神詒之福

一人有慶則天下賴之也若乃握乾符運玉斗陰翊陽書八夤之外視若庭闕執其樞機各効其職易曰天行健君子以自強不息言

天子體乾之德則貞元相衍天且弗違也  
皇上文思濬哲聲律身度

聖學淵邃

宸章景炎攬道德之精剛闡禮樂之秘寶是以天下  
蔚蒸彪列與三代同風詩曰倬彼雲漢爲章于  
天周王壽考遐不作人言文德之化成也

皇上布昭神武歲以蒐獮講事

躬練士卒平金川犁伊犁因壘堅昆之城采阻拔達  
之部闢地二萬里外

天錫智勇內斷乎一心於是康居大宛之長雕題獯

耳之族咸珥貂佩綬嬖姍敦率乎

彤墀之下

天子坐明堂而朝之中外禋福天衢地釐其在詩曰  
受小共大共爲下國駿厯何天之龍敷奏其勇  
故百祿是總也皇皇哉古今之鴻烈帝王之景  
命非甚盛德曷克臻此者乎

皇上幾康緝熙自今至於萬年不遑暇逸日升月恒  
輪環無端與天地似永以乾乾蓋受命之延洪

彌性之純常其符甚負可得而言也謹作頌曰

天篤大德

皇則有之龍翼河圖惟

皇受之受

天祚禧如子如取廣輪無疆亦孔之厚

章

自我

列祖受命溥將逢涌渾淳濬發其祥遙求

世德于宗子祊篤我駿惠昭哉有常

二章

離離翩翩鳳凰  
鳳駕問安

慈寧

躬侑饗  
躬扈

輦時巡  
秋原春稼以介繁祉

天休是迓

三章

帝勤民功  
卽康卽田風雨時若誠求必先歲復惟正

躬奠大川

堯禹之德保極億年

四章

宜民宜人允釐庶績綱紀八紘無間邇遐小大廉法  
各職其職福履之膺唯

皇則錫

五章

訐謨大猷禮樂賅備

文命之敷天采地績

皇言如綸經緯萬世追琢羣雅壽胥與試

六章

乃纘我武以覲

烈光六師作之匪紓匪康崇嶽渟海

省觀四方赫赫濯濯純熙用章

七章

克明克斷承

帝之眷遂定西極日月所餞二萬里外我宅我田四

表來庭申命孔羨

八章

月輪幾望日光秋中

天子萬壽萬方來同氣和穀登民肥歲豐拜手鼓舞

紀

天之功

九章

皇上五旬萬壽頌

謹序

翁方綱

聖皇御極二十有五載景運積於中天六合布瑞三  
光效祉綿延邇茂彙福履而膺天慶於時萬福  
拱極萬邦呼嵩實恭逢我

聖皇之五十萬壽也

臣

竊惟自古帝王受禋錫福必

當大化滂洽履和納豫是以鏡醇粹闡顯懿本  
耀於光明若乃揆文奮武遠至邇安輯熙於富  
祇參象乎昊穹衍生成之瑞紀叶中合之徵應



巍皇罄宜時萬時億斯臚福之極則矣矧其覆  
燾萬物登薄海於仁壽時叙時雍久成久照以  
萬年肇祐而天地同春者哉欽惟

皇帝陛下合德於

穆清紹

祖武揚光烈大功定大猷升天瑞地符蕃釐會合實  
凝集於

皇躬奉

慈寧崇

懿祐浹嘉惠垂休德孝奏天儀如日月光禔百福維  
百祿是以

天錫純嘏惟

至孝光也緝熙宥密折衷一貫遊神性理包舉藝文  
暉麗造物昭章雲漢乃文乃武惟天惟堯是以  
天保多益惟

至德徵也普汜大惠勤恤民隱子育萬方懷柔百福

陳常振德海隅率俾闡澤徧昆蟲後來動海外  
是以

天畀繁祉惟

至仁永也惟時惟幾之綱之紀章程懋密品式周備  
敕萬幾釐百工綜六府三事同律度量衡是以  
天授弗祿惟

至治康也體元則大歛福保極道格肇倫義征不諠  
貞明貞觀同軌同文雲翔日麗海涵嶽峙是以

天篤鴻佑惟

至化成也時維八月五位時序五氣順布星同色嶽  
修貢匯羣禱萃百祥閭闔占風南郊候星拜華  
收以宣沆碭召南呂而導英莖展激灋之月波  
秘宵宸之桂華煌煌瑞莢舒靈葉而迓  
天光者逾旬而三矣茲乃虹流電繞之辰

龍飛大衍之期紫雲靄其紉縵丹霞施其灼爍金闕  
晃而泛波天乳明而降醴宮花萬樹以麗翠綠

禽千聲而送喜珍果磊砢而垂珠文鱗涵泳而  
枳囿嘉穀共穗靈芝九莖枝腰萬年稼登萬寶  
絳縣陳椒華封效祝衆貺駢集普天歌舞

聖皇方獻慶

慈闈祥溢

宮庭禮儀具備和樂胥暨

天閭啟萬國來

皇風滂洋

聖日四照鸞翽桐矣鹿呦苹矣

壽萬春矣

壽作人矣醴化旣沛厚祐旣備當此之時天地六寓  
熾昌壽穀拓入表以開慶筵運乾亨而鈞一氣

聖皇統福祿則該蘊山岳闡明聰則包絡升恒德新  
業富則盛於川之方至全體大用則貫乎松柏

茂承符慶悉轉休祐總集

臣

不揣愚陋敬擬

人九如之義作頌九章謹拜手稽首以獻

帝臨萬方維祺維壽時純熙矣育萬物而茂于載于  
覆輔相左右實而實受猷穀單厚斂錫鴻祐溥納于  
在宥道光豈矣以浹宇宙

一章

昊天佑有成

列祖肇有聲我

皇受之備祿位壽名緝福以豐格

神以誠以罔不昭明式祐斯并庶邦惟承庶徵惟寧

四極曼壽百祐充盈

二章

天式慶於九有承歡于

聖母

帝贊

慈祉若贊

天之紀穆穆治哉釀以滌瀝百祥載履百神載喜百  
祥履矣惟其旨矣百神喜矣萬年以始矣

三章

惟

后綏厥衷惟



聖建厥中備德于

宸躬受穀而豐道凝惟崇德施惟隆不冒日有功扇  
慶于

皇風億兆人來從億萬年其同闢明達聰疇不荷于

帡幪

四章

民之質矣日式

聖之道誕我

聖之道惟民是保如魚樂在藻如赤鞠在抱聽民祝

分

聖壽如

蒼昊遊我熙皞錫我難老

福極永昭使我世世壽考

五章

帝德健行庶政又寧庶事又從有緝熙于光明既祐  
既平咸各得其中吏之廉是程歲之和是登以利莫  
不興以積莫不疑運斗在衡咸惟

壽筵慶成

六章

聖化之綢繆實惟

聖人迺

文武聖神迺

君師尊親曰庶土庶民來獻贊獻琛有圭璋璆琳有  
馬翼臣鄰有駒在場有鳳在林以萬國爲家以萬年  
爲春

七章

暢干羽矣沛膏雨矣慶雲凝於樹瑞露密于圃菊薌  
維祐桂醕維醺有壤而歌有衢而舞或獻茶椀或齎

或鼓

帝作照作觀用式常于多嘏

八章

大慶懋哉惟

帝德晉該普天樂只暨八埏九垓歌有臺有萊曰孔  
固孔皆惟治光昭回惟

聖壽崔嵬

壽筵永開以解慍阜財於萬斯年萬福于胥來

九章

皇上五旬萬壽頌

謹序

戴第元

國家海宇乂安民氣和樂仁風翔於寰區沛澤濡  
於方隅日出以東暨乎西極流沙之墟窮髮之  
北跂行蠕息含齒戴角資生之倫罔不熙熙咸  
獲厥所浩浩乎大哉

聖人在上天下壽矣天下以

聖人之壽爲壽亦莫不欲以被壽於

聖人者壽

聖人當茲

萬壽之辰萬邦黎獻喁喁然于于然鼓舞歡欣風傳

率土維茲百爾臣工請所以爲

聖人壽者以將祝嘏之私以慶

一人無疆之景命

皇上聖不自聖謙尊而光奏未可凡一切稱賀儀文  
却弗事事古帝堯舜所爲有天下而不與殆其  
是矣羣臣仰

聖德之高深益感激無似思竭區區形爲歌詠夫頌  
君之辭莫古於華封人之三祝其最著者則莫  
如天保之詩臣嘗誦詩至如山如阜如岡如陵  
諸章往復諷詠見其效祝於君者比物連類不  
一而足其意纏綿而不已其辭繁而不嫌於複  
一篇之中言如者九蓋皆感於君德而忠愛之  
誠之所出也而臣竊有進焉者謹按鄭氏曰正  
小雅大雅皆周室居西都時詩而是詩則槩以

爲下答上之辭不知其果何爲而作也若我

皇上盛德大業超越千古

臨御以來勵精圖治歷久如一日是故續

祖服奉

慈寧至孝也省刑議獄蠲租賜復所豁無算至仁也  
御經筵崇實學

天章宸翰日星烺烺然至文也金川大定西陲永寧

益地數萬里而



神機獨握至武也凡夫河嶽應靈而風效順一時之舉動一事之經營莫不本

至誠無息之心上參天下兩地默運四時用昭萬世之不基懿鑠哉孕虞育夏包項軼軒生民以來德福未有若斯之隆也則以今日而思天保詩人所遇之君誠尤有幸以天保詩人所願於君者上頌於我

太平壽考之仁君則詩人之意雖厚而所以舉似者

猶未宏詩人之辭雖善而所以敷陳乎盛美者  
猶未足仰對

休命於萬一旦序詩者謂人君以鹿鳴以下五詩燕  
其臣臣受賜者歌此詩以答其君夫一燕饗也  
詩人愛之頌之誠動於中已如此焉況夫

湛恩汪濊有加無已際斯虹流電繞之期其宜式歌  
且舞廣引博稱以明

聖德祝

聖壽惓惓之忱曷其有極然則白麟赤鴈不足以爲  
祥紫脫朱草不足以爲瑞銀甕玉雞器車澤馬  
不足以爲

盛世之休徵惟夫

大聖人撫辰熙績久道化成使仁風永翔於寰區沛  
澤永濡於方輦外薄四海跂行蠕息含齒戴角  
資生之倫永慶得其所自非極之天地之大四  
時之久曷足以昭

帝德之廣運而徵

聖天子億萬斯年之鴻庥此

臣

所爲據愚陋之衷欲

進天保詩人而廣之也抑

臣

伏見

聖壽之年上瑞頻臻邇者畿輔內外五日而和風至  
及旬而甘霽零旣霑旣足書大有秋蓋

天知我

皇上無日不以生民爲念多方順應不用降康所以

娛

聖人之心而錫以仁壽誠未有艾焉已矣

臣

猥以庸

末備員史館幸遭逢茲盛敬援九如之詩廣其  
義於天地四時備擬形容爲頌九章以

獻切愧不文之儼難名

帝德若夫歡欣和悅以盡羣下之情

微臣

竊願附於

拜颺之末焉頌曰

於皇乾儀篤生我

后竊英駕聖雲瞻日就言用其九言乘其六

叶

永誠

和我區宙惟德音是茂惟萬邦是祐邦之祐兮

天子壽兮如天之無不覆兮

一章十  
二句

惟天爲大惟地克配惟天下

至誠乃叶地天泰博兮厚兮地昭其理

叶悠兮久兮

聖成其才

叶

不震不虧

叶

不不哉如地之無不載

二章

十句

穆穆垂裳泰階以平三微一著協千大中

叶惟我

皇翊運譬如四時之錯行一張一弛執矩執衡上罔

九垓下泝八瀛融風彩露億萬斯年

叶三章  
十二句

天子萬年福祿是膺中璿上瑞宏于

一人

叶

自今以始延繩繩日如日之升扶桑初耀以

爲天下文明

四章  
七句

瞳瞳之日月斯承之巍巍我

皇福斯仍之旣福旣壽而康而寧

聖壽如何如月之恒月之恒炯圓靈秋之中霽

堯廷黃葉滿桂華新乾坤朗

聖人生

五章十  
六句

帝寶連暉皇源俊邃亦經於天亦緯於地丕乃澤東

漸西被丕乃福握河截海

叶

水建千年曰惟

聖之瑞積厚流長曰惟

聖之時

叶

厥時維何

天子萬歲德洋恩溥浩兮無際如川之方至

六章十  
七句

有喬者松在林之岫有青者柏言挺其秀如松栢之

茂伊下民之祝下民之祝



上帝之祐以祐以孚

叶

天子之壽壽考維祺慶

一人有道

叶七章  
十二句

天眷有道嘉此良辰自海隅日出蒼生

叶

莫不尊親

曰我

后思文重華復旦郁郁彬彬如竹箭有筠祚我長齡

永以爲

天子獻

叶八章  
十句

獻之

天子小大稽首曰惟岡之厚曰惟陵之久曰惟阜之  
有阜之有矣德之茂叶矣岡之厚矣福之受矣陵之  
久矣永言保叶之矣於斯萬年如南山之壽矣九章十三

句